

Glenbert Croes a entrega su retiro como minister y ta sospechoso den caso Portulaca

Ayera mainta, comunidad a haya informacion tocante un entrada hudicial cu tabata tumando luga na area di Bubali na unda despues a bira conoci cu Glenbert Croes, ken tabata fungi como minister demisionario di Labor, Energia y Integracion a ser deteni como sospechoso principal di e investigacion penal denomina "Portulaca."

E detencion ta den cuadro di e investigacion Portulaca, e cual a cuminsa na luna di juni ultimo y ta trata di un investigacion cu ta andando algun tempo caba di Landsrecherche bao di guia di Ministerio Publico.

E tempo ey, Croes ken tabata minister den funcion a señala cu "Portulaca, ta un investigacion cu ta data di aña 2020-2022. Manera tur hende sa, minister Croes a tuma e cartera di integracion na November 2021, cu e meta pa traha na combati corrupcion den e departamentonan bou di su encargo, pero especialmente den e proceso di otorgamento di permiso na esnan cu ta cumpli cu e rekesitonan. Pa

e motibo aki, el a instrui na e departamentonan concerni, pa duna ful cooperacion na e investigacion cu Ministerio Publico ta haciendo. Tambe, Croes a confirma su pleno confiansa den e imparcialidad, eficiencia y efectividad di e investigacion di Ministerio Publico, pasobra ta asina so lo por duna claridad na dudanan, erornan cu ta wordo cometi."

Ayera, procurador general Sra. Amelin Flanegin a informa cu despues di e detencion di Croes a tuma lugar un listramento ("doorzoeking") den su cas.

E investigacion aki ta entre otro dirigi riba e sospecho di delitonan encuan to duna mento di permisonan di estadia/trabou entre 2020 te cu awor.

Anteriormente, dia 4 di juni 2024 den e mesun investigacion Portulaca, detencionnan tambe a tuma lugar caba. E tempo ey tambe listramento den diferente cas por ehemplo, esun di su mama unda e fundacion "Union ta Forsa" a ser reactiva pa campaña 2021 y edificionan comercial a su-

cede y a confisca diferente obhetonan.

Di e investigacion haci despues na e obhetonan confisca, e sospecha contra e minister a surgi y Ministerio Publico a aplica riba e sospechoso restriccionnan den interes di e investigacion. Esaki ta nifica cu e sospechoso por tin contacto solamente cu su abogado y no cu otro hende.

Entre otro pa e motibo aki Ministerio Publico ta cauteloso cu dunamento di mas informacion encuan to e contenido di e caso aki.

Ministerio Publico a enfatisa cu encuan to e momento cu e detencion di e sospechoso a tuma lugar, sucesonan politico nunca ta influencia curso di un investigacion penal y aworaki tampoco.

Ministerio Publico y Landsrecherche ta mantene den investigacionnan penal na nan propio planificacion/planning. Loke descubri durante e investigacion frecuentemente ta determina e momento di detencion di un sospechoso y e ehecucion di listramentonan ("door-



zoekinging").

Por lo tanto, cu e detencion ta tabata ayera tin di haber cu e momento den cual e sospecha contra e minister a surgi, e planning/planificacion di Landsrecherche, hues-comisario y Ministerio Publico y tur esaki no ta diferente fe loke ta usual den otro investigacion.

Cu gobierno a cai dia 9 di september y cu despues eleccion a wordo yama, por lo tanto no a influencia e planning/planificacion aki. E investigacion penal ta sigui. No ta exclui cu mas detencion lo por tuma lugar den e caso aki. Den interes di e investigacion cu ainda ta andando, Ministerio Publico na e momento aki no ta duna mas informacion.

Siguientemente, Gobierno di Aruba a traves di un comunicado di prensa a informa cu "manera a wordo palabra adelanta, si un minister bira sospechoso, e ta entrega su retiro inmediatamente conforme articulo 17 di ley di Integridad di minister. Gobierno di Aruba ta pendiente pa ricibi e carta di retiro di e minister."

Dos ora despues, "den number di Gobierno di Aruba y den mi capacidad di minister presidente, mi ta informa e renuncia di minister di Labor, Integracion y Energia Sr. Glenbert Croes. Señor Glenbert Croes mes a tuma e decision aki pa retira di su posicion pa motibo di ta wordo considera un sospechoso den e investigacion di e caso Portulaca. Adem as den Partido MEP y den gobernacion actual tin principio y regla, cu si un minister of miembro di parlamento den funcion bira un sospechoso den un caso,

cu e lo tuma su retiro inmediatamente pa asina garantis a transparencia y permiti cu e proceso legal sigui sin obstruccion."

Adem as, nan a expresa cu "Gobierno di Aruba ta gradici Minister Glenbert Croes pa su servicio y pa su cooperacion brinda durante nos periodo di gobernacion. Nos ta desea Glenbert Croes su famia y su sostenedornan hopi forza. Tur trabao pendiente di su ministerio lo bay wordo atendi sin interupcion pa un colega minister. Mas despues lo anuncia cua minister lo tuma over e carteranan concerni."

Di su parti, e partido di coalicion Raiz a duna un declaracion riba e sucedido riba nan rednan social indicando cu: "Democracia ta apoya su mes riba e confiansa entre pueblo y gobierno. Corupcion, di cualkier forma, ta mina e confiansa aki y pues mina nos democracia. Awe Aruba henter a tuma nota cu un biaha mas corrupcion ta bati na porta cerca e partidonan tradicional. E partidonan cu diariamente ta haci un gran esfuerzo pa mantene nan popularidad den pueblo bendiendo nan mes manera algo cu nan no ta. Aruba no por carga e consecuencianan di politica cu ta destrui nos confiansa den gobernacion mas. Plataforma Raiz ta distancia su mes completamente di cualkier tipo di corrupcion y lo keda boga pa transparencia, husticia y integridad. E siguiente eleccion lo ta uno historico unda cu nos por cambia e ruta di nos politica permanentemente. Awe nos ta bolbe confirma cu nos pais mester di un cambio fundamental. Pa nos y pa esnan cu ta bin despues cu nos." partido Raiz a señala.